



## **PRESS SECRETARIAT**

**MINISTRY OF THE PRIME MINISTER & CABINET**

**Apia, Samoa**

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: [presssecretariat@samoa.ws](mailto:presssecretariat@samoa.ws)

**Press Release**

**10 Aperila 2008**

### **1. Lipoti Fono i Tailani.**

Ua faamaonia e le Kapeneta le lipoti o le Fono Lona Lua a Pule Fa'atonu ma Kamupani Tau Feso'otaiga a le Lalolagi, lea na faia i Tailani, 10 – 13 Mati 2008.

O lenei fono sa talanoaina ai ni mataupu e aofia ai:

- i. Avanoa Lautele tau feso'otaiga ma lona faatupeina;
- ii. Feso'otaiga mo faalavelave faafuase'i;
- iii. Faaaogaina o masini i se auala ia maualalo ai tupe faaalulu; ma le
- iv. Faatauaina o faiga faatauva mo feso'otaiga favaomalo.

O nei mataupu taua e fa sa soalaupuleina ai auala uma ina ia mafai e atunu'u ona tauaveina ma faaleleia atili lo latou faaogaina aua le faaleleia atili o auaunaga tau feso'otaiga, aemaise le paū maualalo o tau o loo latou faaogaina.

O le Pule Fa'atonu o le Matagaluega o Feso'otaiga, Faamatalaga ma Feso'otaiga Vavave Faaneionapo, le Susuga John Morgan, sa fai ma Sui o Samoa i lenei fono.

### **2. Lipoti Fono i Aukilani.**

Ua faamaonia e le Kapeneta le lipoti o le Fono a Minisita Vaifafo o Malo o le Pasefika, lea na faia i Aukilani i le aso 26 Mati 2008, ma, sa ta'ita'iina le usugafono a Samoa e le Afioga i le Palemia, le Susuga Tuilaepa Sailele Malielegaoi.

O le faamoemoe o lenei fono o le fa'aauauina lea o le galuega a le Forum e unaia le Malo Fiti ina ia toe faafo'i le Malo i faiga fa'atemokarasi ma fa'ataunu'u le Faigapalota Fa'alaua'itele ia Mati 2009, e pei ona fa'ata'atia mai i fa'aiuga a le Fono a Ta'ita'i o le Pasefika sa faia i Tonga i le tausaga talu ai.

Ua faia nei le fa'aiuga o le Forum e fesoasoani ai e unaia le Malo o Fiti e fa'atino le Palota e auala atu i fesoasoani tau tupe ma agavaa e manaomia atoa ai ma le tofia o se Komiti a Minisita e aofia ai Samoa, Niu Sila, Ausetalia, Papua Niukini, Niue ma Tuvalu. O lenei Komiti e o'o atu fa'avaitaimi e feiloa'i ma le Malo o Fiti e galulue ma fesoasoani ina ia fa'afoi ona faigamalo i tulaga o le filifilia i faiga faatemokarasi, fa'atasi ai ma le atoatoa o ni fautuaga e fa'ao'o atu i le Fono a Taitai o Malo o le Pasefika e faia i Niue ia Aukuso o le tausaga nei.

**Feiloaina ma le Minisita Vaifafa o Ausetalia – Hon. Stephen Smith:** Na talosaga le Minisita Vaifafa o Ausetalia, le Afioga Stephen Smith, mo se feiloaiga ma le Afioga i le Palemia e talanoaina ai ni mataupu i le va o Samoa ma Ausetalia. O lea fono sa faia i le taeao o le aso 26 Mati ao lei amataina le Fono Minisita o Vaifafa i le mataupu ia Fiti.

Sa fa'ailoa ane e le Afioga Stephen Smith le fa'amoemoe o le faigamalo a Ausetalia e fa'atino se polokalame ua faaigoaina o le 'Pacific Partnership for Development' (Faigapa'aga mo le Atinae o le Pasefika) e aofia ai ni sini lautele e pei o le:

- i. Faaleleia o le atinae aua le siitia o le tamaoaiga ma maua ai avanoa faigaluega;
- ii. Siitia o galuega ma le afaipisinisi atoa ai ma maua o avanoa tau tupe mo pisinisi laiti;
- iii. Fesoasoani ia lelei o aoaoga mo tagata uma;
- iv. Fesoasoani i le soifua maloloina mo tagata uma; ma le
- v. Lagolagoina o faigamalo lelei, atoa ai ma sao o faalapotopotoga i fafo atu o le Malo.

Sa faailoa ane e le Afioga Stephen Smith le fa'amoemoe o Ausetalia e amata atu ia Samoa le fa'atinoga o lenei faigapa'aga ona i lo latou manatu o Samoa e mafai ma faigofie ona vave ona galulue fa'atasi ma Ausetalia.

Ua fa'amoemoe o le afio mai o le alii Faatonu Aoa o le Fesoasoani a Ausetalia (AUSAID), le Susuga Bruce Davis, i le vaiaso lona lua o Aperila o le a mafai ai ona amataina ma faataatia se polokalame mo feutagaiga aua lenei faigapa'aga i le va o Samoa ma Ausetalia.

Na malaga faatasi le Afioga i le Palemia ma le Minisita Lagolago o le Matagaluega o le Palemia ma le Kapeneta, le Afioga Tuiloma P. Lameko, le Afioga Muagututagata Peter ah Him, ma le Pule Sili o le Matagaluega o Vaifafa.

### **3. Lipoti Fono i Niu Kaletonia.**

Ua fa'amaonia e le Kapeneta le lipoti o le Fono a Ta'ita'i o le Pasefika ma le Taiulu o le Komisi mo Asia ma le Pasefika, lea na usua i Noumea, Niu Kaletonia, aso 12 – 14 Mati 2008.

E na'o le Peresitene o Kiribati le ta'ita'i na auai ae suia mai isi atunuu e valu (8) e sui Palemia, Minisita ma le Amepasa mai Niu Ioka mo Papua Niu Kini.

O mataupu taua na talanoaina i lenei fono e aofia ai:

- a. O le saunia lea e le Faalapotopotoga o le itulagi o se pepa o faamatalaga i ni vaega e tali atu ai i le tulaga ma'aleale o le tamaoaiga ma le si'osi'omaga o atunuu e pei o le malosiaga (energy), fesuiiga o le tau, suavai ma le tulaga mausali o taumafa;
- b. O le fa'atinoga lea o se polokalame fa'apitoa mo le Pasefika e mafai ai ona fa'atino ni avanoa e fetufa'ai ai poto masani, fetufa'ai suesuega mo le atinae ma mafai ai ona fesuii tagata faigaluega ma atunuu o Asia;

- c. Na lagolagoina le manatu o Samoa ina ia toe taga'i le Komisi i auala e faatino ai ana polokalame i atunuu taitasi ina ia faamalosia ni faiga faavae ua i ai a e le o le tau amata o nia faiga fou.
- d. Na talanoaina le toe fetuunaiga ua i ai le Komisi ma fesuaiga o loo tau faaofi mai, na lagolagoina e Samoa fetuunaiga ua faia ina ia faataatia le faiga o galuega a le Komisi o i ai nei e faavae i galuega faakomiti mo vaega lautele e i ai le:
- (i) faaitiitia o le tulaga mativa, (ii) pulea lelei o avanoa ua ai ona o le tatalaina o maketi, (iii) vaega tau le soifua lautele. O le faiga fou o le a faamaoti ai ni vaega e faavae ai polokalame o galuega a le Komisi e pei o:
    - Fefaatauaiga ma tulaga tau tupe;
    - Fela'uaiga ma atinae tetele;
    - Feso'otaiga faaonaponei;
    - Si'osi'omaga ma auala e pulea ai sauniuniga mo le faaitiitia o aafiaga o faalavelave faalenatura; ma le
    - Soifuaga lautele ma faamaumauga.
- e. Na faatuina e Samoa le manatu ina ia siitia le tulaga o i ai le Ofisa o le Komisi i le Pasefika o loo i Fiti ma ia lava tapena e aofia ai ma tagata lelei e tuuina atu i ai e mafai ai ona faatino maeaea ana galuega i lea itulagi. Sa talosagaina foi le vaavaai i ni fetuunaiga aupito lelei e mautinoa ai le lagona o le leo o le Pasefika i totonu o fono faakomiti faapea fono faaletausaga a le Komisi.
- f. Na faalauiloa foi gaoioiga ma se polokalame a le itulagi ua tau lalata ona faatino e faaleleia ai fesootaiga e ala i le tosoina o paipa i le moana lea ua lagolagoina e le Malo.

O le Minisita mo Tupe Maua, le Afioga Tu'uu Leota Anasii Leota, sa fai ma sui o Samoa i lea fono, faatasi ai ma le Pule Lagolago o le Matagaluega o Tupe, le Susuga Noumea Simi.

#### **4. Y.P. Reddy – Tanoa Hotel.**

Ua faamaonia e le Kapeneta le faaauauina o le galuega mo le fauga o le Tanoa Hotel e le Kamupani o le Y.P. Reddy i le fanua o Matagofie i Matautu i Apia

O le a toe malaga mai ni sui o le Kamupani o le Y.P. Reddy e faama'eaina le tulaga i ata ma le polokalame mo le fauga o lenei fale talimalo.

**Government Press Release**